

Universidad di Aruba:

Ta traha cada dia mas na promove sostenibilidad den diferente area

ORANJESTAD - Sostenibilidad ta un tema general di hopi importancia na Universidad di Aruba. E universidad no solamente ta den un fase avansa di planificacion pa cu un "Green Faculty", pero tambe ta incorpora elementonan relaciona na "green energy" y sostenibilidad den diferente programa di su facultadnan existente.

Sostenibilidad ta wordo defini omo "tin e habilidad pa wordo uza sin cu e ta caba completamente of ta keda destrui", "envolviendo metodonan cu no ta uza te caba cu recursonan natural of no ta destrui recursonan natural; y "tin e habilidad pa dura y sigui pa un tempo largo". Merriam Webster adicional ta defini sostenibilidad como "relaciona na of siendo un metodo pa colecta of uza un recurso di tal forma cu e recurso no ta caba ful of ta sufri daño permanente; y "relaciona un estilo di bida cu e ta envolve uzo di metodonan sostenibel".

Esaki tambe ta e pensamiento nan cu ta wordo sosteni y comparti den e proyectonan relaciona na "green energy" y "sostenibilidad" na e facultadnan di FEF (facultad di financia, contabilidad y mercadeo) y FAS (facultad di arte y ciencia) na Universidad di Aruba. Ciertu elementonan tambe ta bin bek den programanan na e facultad di ley, unda cu tin algun docente y hoogleraar cu ta haciendo un investigacion pa cu e aspectonan huridico di e "groenebeweging" (e movimiento berde).

E conferencia anual Green Aruba semper ta ofrece oportunidadnan interesante pa Universidad di Aruba (UA), segun Business Director Universidad di Aruba, Patrick Arens. El a splica cu participacion na e conferencia ta ofrece e oportunidad pa UA establece contactonan cu e sector priva y pa sigui



e desaroyonan di mas nobo. Green Aruba tambe ta un oportunidad anual pa papia cu y expande e red di posibel partnernan pa e Green Faculty, den e proceso di su establecimiento.

Minister Mike de Meza, encarga cu Utilidad y Energia, a splica na e conferencia di prensa anunciando Green Aruba 2015, con importante e ta pa Aruba y e futuro desaroyonan na nos isla pa e hoben estudiante participa na e conferencia.

Franklin Hoevertsz, director di Utilities Aruba N.V., cu ta maneha servicjonan di utilidad na Aruba y ta e instancia encarga cu organisacion di Green Conference 2015, ta agrega cu e conferencia ta sigui desaroyonan actual y ta sigui innova. "Ta importante y, en realidad, esencial pa e futuro generacionnan di profesionalnan encarga cu utilidad na Aruba, sea ta como ingeniero, electricista, tecnico y tur e diferente ramonan relaciona na utilidad, incluyendo administradonan di sistema y esunnan encarga cu administracion financiero, ta al tanto di desaroyonan riba e tereno di energia sostenibel," Hoevertsz a subraya.

"Unda cu tin innovacion continuo, manera ta e caso cu e producto y servicjonan relaciona na provee coriente, awa potabel y telecomunicacion, ta importante pa nos hobennan ta participando activamente. E oportunidad pa wak y scucha tocante di e ultimo desaroyonan for di oradornan manera Mark Lambrides, Olav Hohmeyer, Manlio Coviello, Egbert Perry y Rene Hooiveld, ta unico," Hoevertsz a bisa. "Nos ta trece e "thinkers" y "doers" riba e tereno interesante di energia sostenibel Aruba riba un plataforma accesibel hustamente pa motiva nos hendenan, incluyendo nos hobennan, pa "think" y "do" hunto cu nos pa e desaroyo duradero di loke ta e futuro di utilidad internacionalmente," el a splica.

Entre e oradornan di renombre internacional cu a confirma caba ta: Luis Almagro Lemes, secretary general organisacion di American States; Mark Lambrides, senior energy specialist di Worldbank; Manlio Coviello, chief natural resources & energy unit, ECLAC, Nacionnan Uni; Prof. dr. Olav Hohmeyer, profesor na University of Flenburg; Adam Warren, group manager di project development and finance; Egbert Perry, chairman y chief executive officer di Integral; y Director Sustainable Energy TNO, drs Rene Hooiveld.

Algun di e topiconan cu lo wordo presenta ta "Affordable Green Energy in the Caribbean"; "100% Green Power for Barbados - An example for most islands in the tropics"; "Energy Efficiency & Sustainability"; e testimonio di Aruba Learning Event; y "Aruba Renewable Integration Study".

Pa mas informacion y registracion, bishitawww.greenaruba.org.□